

Nimogim Timote Leta **Polimna Iriki Nimogim Timotem** **pilwa Leta** **Isipkita Yitkak**

Onggityam Nimogim Timote Leta irika riga re Polte. I ton ama rika itemb leta yirikonj re Roma taun kena, re ton sibibmetind yibnonj. I ton yirikonj re ama rika A.D. siksti paib dide siksti seben (65-67) kemag gangga nat. I ija e wip ainy da Polind kea b'usaya yimind yusunato onggit kak ke re ton Naskanyam Timote Leta ake Tito Leta erikonj. I ton itemb ket nimogim leta yirikonj Timotem pilwa.

I onggit letand Pol ita ngai odede wumir yokateny da ita ti gangga yibnau opendam sibibmet ke dide momta e ton uj okas. Si onggit mop paemb ji ton itemb leta yirik Timotem pilwa. I Polim ma ina nena e singi da ton Timotend b'usaya yir ong aji ton kwa singi e Timotend ugowam nokip ton b'ogla Polimna misnari wiko siram b'irari kesa omnika iyen dem tina uj kak ke.

Pol mogjog yit yitai Timotend re sosi wang iyoi gatab e dide ket nonony yomneny b'anyginena ouyaena riga wa pilke ewaikenam. I ket Pol danda kima Timotend il yongik nony b'ijawa oramitam iminjog gar ke utkunda mile b'auyaena wa pilind.

Simesime Yitkak

¹ Simesime! Kon Pol ten, i God naska nata kea singi yoramitonj kor pilwa Keriso Yesumna itmikitijog riga awowim. Si yu kon ita onggityam itmikitijog riga wiko omnika yiyenyin riga wa pitapita omnenam Tina tirir omni yirkokar gatab yit rinte re Keriso Yesum pilind yibim. ² Si kon onggityam leta yiriken re koina singi iyeni b'iga Timote, mor pilwa e. Abu Godim pilke dide mera Yonggyam Keriso Yesum pilke wurar i kear i dide ngimbla man kima.

Nony B'ijawa kima Wimenam B'ugowa Yit

³ I kon mor gatab siteket yit yommenenyin Godind yena re kon yewangaenenyin kilkip kesa kukipind nonykok ke, odede rija na re kor b'uarip yewangaeneno. Si it re kon ita bibir dide siwiny yir opmitena nekenenyin, kon ipendi kesa men nonyik miyenenyin Godind siteket omnenam. ⁴ I kon ma sobijog singi e aena nekenyinyin men yir ongongim. Mop nokip kon ita nonyik yiyenenyin moina yirekip kima yii gatab re men wetaweta awonda. Nokim da idenat kodaka sam ke yindangir taen dem ra men yir motngen dem. ⁵ I kon ita nonyik b'amdenenyin onggitim da man gar okai kena iminjog gar ke utkunda mile yokatot. I itemb gar ke utkunda mile naska yibnonj re mor dad moleg Loisim pilnat, i daka ket mor mog Yunikem pilwa awonj. Si kon iminjog yimjasin da onggityam gar ke utkunda mile ita mor pilind yibim. ⁶ Si onggit mop paemb kon men nonony motinyin, nokim da idenat God ma yiyag wurar wul pila b'obogil dimildimil omnika iyenyit. I itemb ji yiyag wurar mor pilind yibim rina re

man yokatot re kon mor pilind yim aramkinond.
⁷ Mop nokip God mera Yinayina Wingawinga nokainonj re ma mogam b'amnena mana, aji danda b'agona mana i singi b'iyena mile omnika mana i dide molenggyam b'agoka mile omnika mana. ⁸ Si onggit paemb man goro ingar taenim mera Yonggyamim gatab b'ogil yirkokar bage yit pitapita omnenam. I kwa goro man ingar taenim kor gatab rinte re kon Yonggyam Keriso map sibibmetind nibnyin. Aji man b'ogla Godimna danda ke kon kima yipand gilgil b'idgotnena okatenyit God ma b'ogil yirkokar bage yit pitapita omnenam. ⁹ I Godit mera yirkokar nokainonj dide ara nemokinonj yina mile yirkokarind wimenam. Si God onggityam mile yomnikonj re ma meraina omniki b'ogil wiko mapena, aji Tinajog isamki singi mapena dide Tina wurar mapena rina re God yoramitonj Keriso Yesum pilind mera okawam, re Ton maka gowukoi yotobarkonj. ¹⁰ Si mera yirkokar okawayam Keriso Yesu re kea pita awonj onggit gowukoi wa. I ingkenaemb ket Ton onggityam Godimna wurar pita wa yomnonj. Si ton ket ujimna danda yeommenonj, i ket God ma b'ogil yirkokar bage yit kenaemb itkika kesa dadal ngirpu kesa yirkokar pita wa yomnonj mera okatam. ¹¹ Si onggit God ma b'ogil yirkokar bage yit map God ken nobagendonj pitapita omnena wiko rigam i itmikitijog rigam i dide ouyaena rigam. ¹² I ket onggit God ma b'ogil yirkokar bage yit wiko ma paemb kon yu odede b'idgotnena yokatenyin it re sibibmetind nibnyin. Aji kon ma ita ingar yokatenyin, mop nokip kon wumir en Yesum ya pilnate re kon gar ke utkunda

yoramitenyîn, i kon danda kîma yimjatenyîn da Ton ririrjog e onggityam gasa owamam rîna re Ton nony nijawonj omnîkam, ngîrpu onggît bibirind ridenat ra Keriso titenj dem. ¹³ I man b'ogla wingata yitim tamorkeneninyit imninena kesa iminjog yitkak rîna re man utkundenot kor pilke. I man b'ogla wîmena metkenyit gar ke utkunda milend dide singi b'iyena milend rinsi re Keriso Yesum pilind ebnya. ¹⁴ Si man b'ogla Yinayîna Wingawîngam pilke danda okatenyit yete re mera pilind wîmena yikeny, i ket onggît danda kaemb man ket b'obogîl God ma b'ogîl iminjog yitkak yîrgong omnîka iyenyt.

¹⁵ I man onggît gatab wumîr et da komkesa rîga yepiya re tuwonj Asiya eriya ke kor pilwa, ton kea ken kak niawo dide ket nîraro. Si towa wingirind kea todaka Pigelo ake Ermogene kak niawonda.

¹⁶ I Yonggyam toko ten kear ramnenin yepim re Onesiporomna metind wekeny. Mop nokip Onesiporo kea ken jogjogpyam gar ngimblam omnîka niyenenonj, i dide ton maka onggityam gatab ingar ke yokatenenonj rinte re kon sein kai ke ijobiki nibnyin sibîbmetind. ¹⁷ Aji re ket ton ikonj dikind Roma taun wa, ton ma sobijog na b'asowa yikenonj ken orakam ngîrpu ton ket nodaronj.

¹⁸ Si Yonggyam toko ti yenjikitau Ti pilke ukoi jog kear okatam onggît bibirind ra Ton titenj dem. I man re wumîrjog et rîja na re Onesiporo komkesa gatab ke ken yîr ipka niyenenonj Epeso taunind.

2

Yesu Kerisomna B'ogîl Geja Rîga

¹ Si onggit paemb kor b'iga Timote, man b'ogla danda kima auka metkenyit Godimna wurar ke rinte re Keriso Yesum pilind yibim. ² I man koina opureni iminjog yitkak kea utkundenot jogjog yir ungata riga wa wipind. Si man b'ogla onggityam iminjog yitkak ninda nony ijaijog riga wa yim kumb wa taramisinyit itmaikenam yepim re ririrkipjog riga wekeny kwa ninda riga ouyae-nam. ³ I man b'ogla yipand kon kima mimkam ke b'idgotnena takateninyit odede it re Keriso Yesumna b'ogil nony ijai geja riga re dide. ⁴ I makwa yipa geja rigat ita b'anomka ikeny ninda tinajog singi wiko omnikam, aji ton b'ogla tina mopyamimna b'ingawand b'atkaeneny yet re tin ara yemokonj tina geja riga awowim. Nokim da idenat ton tin samim omnikeneny. ⁵ I kwa daka ra yipa b'ikok rigat naskajog b'itkeny, aji ra maka yimta undok b'ikenam b'ingawa yit, si ton ma ita b'ogil dira okas rinte ra naskajog b'ikok rigat okas. ⁶ I wala riga yete re ingki wikond b'asowa yikeny tina yonggyamimna b'ingawa yit ririrind, ton b'ogla naska onggit ingki ke owou yingg rakasin ti yonggyamim pilke. ⁷ Si man b'ogla odede yitkak gatab nony menamena omnika eyenine rinsim re kon apureninyin, mop nokip Yonggyam ita men wumir omnena mitiyeny onggityam komkesa yit gatab.

⁸ I man nonyik b'amdene Yesu Kerisom gatab yet re uj ke utnyitonj, it re Dawidim pilke b'usmureni b'iga. Si kon intemb Ti gatab God ma b'ogil yirkokar bage yit pitapita omnena yiyenyin. ⁹ Si onggit mop paemb kon b'idgotnena yokatenyin, ngirpu yu kon sein kai ke ijobiki

nibnyin odede wip it re raskol riga re dide. Aji itemb God ma yit re makwa ita ijobiki yibim.
¹⁰ Si onggit mop paemb kon odede b'idgotnena wingirind mimkam ke wimena nekenyin re towanim b'ogil mapae yena re God abagikinonj yirkokar okawam. Nokim da idenat todaka onggityam yirkokar undokasi okatam rinte re dadal ngirpu kesa b'ogil inyomarena kima yibim Keriso Yesum pilind. ¹¹ Si ite re ji yitkak re iminjog nony ijawa kima e da,

“I rada men kea Ton kima yipand uj aukitondam,
 si men kwa opima Ton kima yipand wimena tuwenyin dem.

¹² I rada men opima b'idgotnena wingirind mimkam wimena wuwenyin Ti map,
 si men opima Ton kima yipand wip omnena riga tainindam dem.

I rada men ita Tin oena iyenyu,
 si todaka opima men oena nitiyeniny dem.

¹³ I nangga ma ji rada men ma nony b'ijawa kima riga im wekenyin,
 aji Ton ita winind nony b'ijawa kima e wimena yikeny.

Mop nokip Ton re nony b'ijawa riga e dide Ton ma ririr e Tilenggyam oenam onggityam Tina nony b'ijawa mile.”

Godimna Imjati Wiko Riga

¹⁴ I man b'ogla komkesa riga tamneninyit onggityam gasa gatab nonyik omdenam. Si man kupkakupka danda kima ten tengaeninyit Godim wipind da, “Win erarkinam odede korirkorir yit b'ugwatena mile ringkaim re maka rigap

b'ogil akatenanj aji onggityam milepim riga negir amnikenenanj yepim re utkundenenanj.” ¹⁵ I man b'obogil b'asowa mekene God ma iminjog yitkak dimdim ikalnenam, i ingkaemb man Godimna imjati riga taet, i dide ket odede wiko riga taet yet ra maka ingar tainy tina wiko gatab. ¹⁶ Aji man b'ogla ewaikene odede kip kesa Godind nony iyena kesa yit b'usenena riga wa pilke. Mop nokip odede rigap riga wip amnenanj re Godind ewangaya kesa kilkil mile oikindena mim. ¹⁷ Si towaina opurena re odede kopa pila e rinte ra garind warabag tawik itkikam. I towa wingirind osiya ji riga ebnya Imenayo ake Pileto. ¹⁸ Si osiemb riga nimog re Godimna iminjog yitkak esungaijog i ebnya. Si ton ija imemb ji opurena eyeninya da utnyita mile re kea naska nata aukonj, si ma ita wari tawik. Si ton odede yit kaimemb ninda gar ke utkunda rigaina gar ke utkunda mile negir omnika eyeninya. ¹⁹ Aji sosi re kea Godimna ispiki danda kima imnineni kesa met orangapu pipmet kumb nate yibim dide kwa onggit yit ke iminjog imjati e yibim da, “Yonggyam wumir e yepim re Tina riga” dide “Komkesa riga yepim re Yonggyamind nyi yuwatenyi towa Yonggyamim, ton b'ogla rewaikeninem komkesa negirjog mile wa pilke.” ²⁰ I jogjog gasa kima rigaina ukoi metind opima de gold ke dide silba ke omniki ingaena gasa. Aji ma odede ukoi wulkip kima gasa nena im wekeny aji daka wul ke dide pam ke omniki gasa toda opima wekeny. Si onggityam gasa wingirind ninda re isnawa kima b'obogil ingaena mim aji ninda re isnawa kesa jabajaba ingaena mim wekeny. ²¹ Si onggit paemb yet ra tilenggyam kilkip kesa tainy

onggityam komkesa negirjog mile wa pilke, si ton ita isnawa kima ingaena gasa pila tainy. Mop nokip ton kea yina ai e yibim dide ton re kea b'ogiljog riga e ainy Yonggyamim ingaenam, i dide ton kea b'angonjeni e yibim komkesa b'ogil wiko omniam. ²² Si man b'ogla b'ikene sisil rigaina gowukoi gim ke singi mile wa pilke. Aji man b'ogla odede riga kima yipand sam kima wimena metkenyit yepim re Yonggyamind nyi yuwatenyi kilkip kesa gar ke, i ket man egaregar riga na mitibnyit odede mile okatenam, opi re negir kesa dimdimjog mile, i gar ke utkunda mile, i singi b'iyena mile i dide ngimbla mile. ²³ I kwa man b'ogla bond tepeneninyit korirkorir dide multekip kesa yit b'ugwatena mile. Mop nokip man wumir et da ita ingkek ukoi jog soro kima yit b'ugwatena pita tainy. ²⁴ I Yonggyamimna wiko rigam re ma ririrkipjog e soro kima yit b'ugwatena mile omniam. Aji ton b'ogla komkesa riga wa pilwa musik isnawa nony kima mile ke tamnikeneniny, i riga b'obogil ouyaena teyeniny i dide ket ton b'ogla negirjog mile wingirind mimkam wimena ikeny. ²⁵ I ton b'ogla nony kima musik wimena mile ke odede riga yimak itaya teyeniny yepim re owinkanj ti pilind geja omniam. Si ra ton yimak itaya teyeniny, ton b'ogla odede nony kima da rika God opima towaina gar tengenjiny iminjog yitkak wumir aukam. ²⁶ I ingkaimemb ton ket b'obogil nony tepangkanj Satanamna disim pilke itringendam. Nokip re ton Satanamna dis borand okati wekenonj, ton mile amnikenento re tina singi ririr nat.

3

Kikitum Winind Godind Ewangaya kesa Mile

¹ I man b'ogla onggit gatabim wumir yokate da kikitum winind opima moga kima bebig win pita taukanj dem. ² Si ra opimemb win pita taukanj dem, odede riga im taukanj dem, opi re towalenggyam nena singi b'iyena riga, i wulkip singi iyena riga, i b'asourena riga, i towalenggyam pumb wa b'urowatena riga, i b'isadrena riga, i b'u ake mogwar utkunda kesa riga, i siteket b'amnena kesa riga, i yina b'amnena kesa riga, ³ i kear kesa riga, i ninda rigaina negir mile gatab kear kesa riga, i ninda riga wanim negir yit opurena riga, i towalenggyam b'agoka mile kesa riga, i wip inggrawa kesa mile riga, i b'ogil mile singi kesa omnena riga, ⁴ i towaina riga tib iyena riga, i isanikesa korirkorir mile omnika riga, i b'asourena mile ke ukoi b'amnena riga, i dide gowukoi sam okatenam ukoi singi b'iyena riga, aji ma Godind singi iyena riga im. ⁵ I kwa ton opima gim ke Godind ewangaya mile nena omnika eyenanj, aji towaina gar ke re ita Godimna danda yoenenyi rinte re Godind ewangaya milem pilke pita aena yikeny. Si man b'ogla odede riga wa pilke ewaikene. ⁶ I towa wingirind ninda b'anyginena ouyaena rigap rigaina met nata b'igarena wuweny, dide ket ton gar bodakak kongga nony ejomka eyenanj yepim re negir mile angurka eyenanj dide kwa jogjog b'engabenga gim ke singip ten wip eyenanj. ⁷ Si odede konggap ita winind opima b'auyaena wuweny sisil ouyaena gatab, aji ton makwa ririr im aenanj iminjog God ma yitkak wumir aukam.

⁸ I naskand b'ila osiemb riga Yane ake Yambre Mosem pilwa gejam onyitonda. Si opimemb b'anyginena ouyaena riga todaka odede yipa wip nya kaim gejam owinki wekeny God ma iminjog yitkakim pilwa. I opimemb riga towaina nonykok re negirjog itkiki im wekeny dide towaina gar ke utkunda mile re makwa yipa ririrkipjog im God ma iminjog yitkak kima. ⁹ Aji ton ma ririr im onggityam mile omnikand pinjog tekeny. Mop nokip towaina wumir kesa korirkorir mile ra opima komkesa riga wa wipind pitand taukanj odede wip rija na re aukonj Yane ake Yambre wa pilind.

Timotem pilwa Yimak Itaya Yit

¹⁰ Aji re man ken yimta undoka niyenot, man kea odede komkesa kor gatab mile yir ongong eyeninot, opi re nangga na kon ouyaena eyeninond, i ridede na kon yirkokar wimena nekenond, i nangga mop kima na kon wimena nekenond, i kon ridede na gar ke utkunda milend nekenond, i ridede na kon musik wimena nekenond, i kon ridede na singi b'iyena milend nekenond, i kon ridede na mimkam wimena milend nekenond, ¹¹ i ridede na kon ji ke negir kima b'idgotnena akateninond, i ridede na kon b'idgotnena akateninond, i nangga na kor pilind aukenento de Antiyok taunind i Ikoniyon taunind i dide Listra taunind, i dide ridede na kon ji ke negir kima b'idgotnena wingirind mimkam wimena nekenond. Aji man wumir et ridede na Yonggyam kea ken nitringendenenonj onggityam komkesa bebig wa pilke. ¹² Si ra komkesa riga yepim re

Keriso Yesund gar ke utkunda ke yokatenyi ton singi taenanj iminjog Godind ewangaya milend wimenam, ton opima negir kima b'idgotnena okatena teyenanj. ¹³ Aji negirjog mile riga dide b'anyginena ijongki nya ke rabem b'amnena riga, ton opima negir mile oikindena eyenanj de negirjog mile wa. Mop nokip ton opima riga b'anyginena ijongki nya ke rabem omnena eyenanj dide daka ton odede yipa wip nya kaim towalenggyam rabem b'amnena wuweny. ¹⁴ Aji man b'ogla onggityam yitkak wa pilind wimena mekene rina re man b'auyaenot dide ket man gar ke utkunda ke imjatena eyeninot. Mop nokip man towanim wumir et yepiya re men mouyaeneno. ¹⁵ I kwa man yina peba yitkak wumir auka metkot re b'iga sobijog kena. Si onggit yina peba yitkakip ririr im mor yirkokar okatam b'ogil multekip motkai gar ke utkunda mile ke rinte re man yoramitenyit Keriso Yesum pilind. ¹⁶ I kupka yina peba yitkak re Godimna b'imuri kima im, si ton ririrkipjog im odede milend ingaenam, opi re riga ouyaenam, i negir mile gatab imjati kima samany iyowam, i kaokao mile riga dimdim omniam, i dide yimak yit omnienam negir kesa dimdimjog milend wimenam. ¹⁷ Nokim da idenat odede riga ririrkipjog God ma riga taukanj dide ton ket ririrkipjog tekeny komkesa b'ogil wiko omniam rinsim re God singi eyeniny omniam.

4

¹ I kon kupkakupka danda kima men mitngaen Godim wipind dide Keriso Yesum wipind yet ra yilo riga dide uj riga isagika teyeniny dem. I

kwa ra Keriso Yesu pita tainy dem, Tina pumb tungg ita ik dem. Si onggit paemb kon odede danda kima mitngaen. ² Si man b'ogla God ma yitkak pitapita omnena yiyene, dide ket man ita winind onggityam moina gatab wikond kinyir aena mekene, b'ogil winind dide negir winind. I kwa man b'ogla komkesa gatab ke musik wimena kima riga ouyaena teyeninyit, i ingkaemb ket man negir mile gatab imjati kima riga dindim omnika teyeninyit, i samany iyowa teyeninyit, i dide ugowa teyeninyit. ³ Mop nokip ra win ik, rigap ma opima takatenanj dem God ma iminjog dindim ouyaena yitkak, aji ton towaina singi ririr nasim ouyaena yitkak nena takatenanj. Si ton opima odede jogjog ouyaena riga imda teyenanj yepiya ra ten tauyaenanj dem nangga mim ra ton singi taenanj utkundenam. ⁴ I kwa ton opima yipya idoka teyenanj dem God ma iminjog yitkak utkundenam, aji ton yipya b'itkena tuweny dem kip kesa kakyit utkundera mim. ⁵ Aji man komkesa gasa gatabim b'obogil nony ipangki na mitibnyit, i negir kima b'idgotnena takateninyit, i God ma b'ogil yirkokar bage yit pitapita omnena wiko omnika iyeniyit, i dide moina wiko ririrkipjog omnika teyeninyit rina re God mokainonj omnika.

⁶ Mop nokip kon Godim wikond b'ingaenenond i ket koina yirkokar re kea b'undwatapu wa e ainy odede ringma ra si rigat ik igmarik tina si mile undwatam. Si kor kemb ite ke win nitkau onggityam gowukoi iraram. ⁷ I kon kea bebig wingirind b'ajobrena nekenenond God ma wikond odede ringma ra b'ipowa wiband rigat b'ajobrena kima

b'ipowa ikeny, aji kor kemb ite ke dikind seg ainy. I koina yirkokar b'ikok re kemb ite ke dikind und-watapu wa ainy. I dide kwa kon gar ke utkunda mile kea danda kima emorka iyimin ngirpu yu. ⁸ Aji inte kornim wip ke komb gasa yibim okatam, it re negir kesa dimdimjog b'ogil dira. Si negir kesa dimdimjog b'isagika riga, Yonggyamit ita onggityam dira kor notkau onggit bibirind ra Ton ik dem. Aji Ton ma kornim nena ma notkau dem, aji daka kwa komkesa towanim ma yepim re singi iyena kima yir yungai Tina openda gatab.

Pol Tinajog Gasa gatab Yit

⁹ I man danda ondrasit wanakana kor pilwa menonim. ¹⁰ Mop nokip Dema kea niraronj dide yikonj Tesalonika taun wa, nokip ton singi eyenonj re onggityam gowukoi gasa na. I Kreske kea daka yikonj Galatiya eriya wa, i dide Tito daka kwa yikonj Dalmatiya eriya wa. ¹¹ Si Luk nenate kon kima yibim. I man Makind iyit dem kor pilwa man kima ra man metket dem. Mop nokip ton re kornim b'ogil yim b'akawa riga e tainy koina wiko omniam. ¹² I kon kea Tikikond yitmikitond Epeso taun wa. ¹³ Si ra man metket dem, man b'ogla koina tumind pinpin kobirgim iyit rina re kon yiraronj Karpomna metind de Trowa taunind. I kwa man teyinyit dem ninda koina peba aji ukoi jog re b'angga gim ke omniki peba na. ¹⁴ I Aleksandro yete re ayin ke gasa omnika riga yibim, ton re ma sobijog na negir jog mile kor nomnikenenawainonj, si Yonggyam toko ti mira yetendau tina omniki mile ririrind. ¹⁵ Si madaka tinim yir kima mitibnyit. Mop nokip

ton ma sobijog danda kima na gejam onyitonj meraina ouyaena yitkak gatabim.

¹⁶ I re kon naskajog b'isagikapu pipmet wa onyitond kor gatab b'irmekam dikind Roma taunind, makwa yipa riga kor tab ke awonj irmeka yit opurenem. Aji komkesa rigap re kea ken nirareno. Aji kon singi en da God goro towa ragenau onggityam towaina negir gatab. ¹⁷ Aji Yonggyam kea dikind kor tab ke onyitonj dide ket kor danda nokaenonj. Nokim da idenat Yonggyam ken nitngaeny kupkakupka God ma b'ogil yirkokar bage yit ririrkipjog pitapita omnenam, i ingkaemb ket komkesa yitam b'engabenga rigap onggityam yitkak tutkundenanj. I ket Yonggyam kea ken nitringendonj ujim pilke.* ¹⁸ Si Yonggyam ita ken itringindena nitiyeny komkesa negirjog mile wa pilke dide Ton ket ita b'obogil nii dem Tina pumb tungg wa de pumb wa. Si b'ogil inyomarena Ti pilwa dadal ngirpu kesa ngirpu kesa, iminjog.

Undwatapu Yitkak

¹⁹ I man widaemb yit tamninyit Priskila ake Akwila dide towa pilwa yepim re wekeny Onesiporomna metind. ²⁰ I Erasto ama yibim de Korinto taun wa, i kon Tropimond yirarond Mileto taunind nokip ton kopa na yokatonj. ²¹ Si man danda ondrasit wanakana menonim dikind, yimta kena gibil win ik dem. I Yubulo i Pude i Lino i Klaudiya i dide komkesa gar ke utkunda nany dide yingganwar men madaemb yit momnenyi. ²² Si

* **4:17:** Grik peband da “laiyonimna tu bora ke”. Nokip onggit winind ninda sibibmet riga wibapu wa aramkenento laiyon kima b'ipowam ngirpu ra laiyonip ten tangranj.

Yonggyam toko moina wingawinga kima yebim.
God ma wurar komkesa win kima.

Wipi Yit God ma Yina Sisil Yina Peba
The New Testament in the Wipi Language of Papua
New Guinea
Nupela Testamen long tokples Wipi long Niugini

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

PDF generated using Haiola and XeLaTeX on 11 Nov 2022 from source files dated 9 Oct 2020

a5a5213a-fb12-52b5-9c99-efb8044c6646